

續行水金鑑卷第一百七

運河水

章續三十五

嘉慶七年二月二十四日奉

上諭陳大文奏北運河應行建築隄壩挑淤開河各要
工繪圖進呈請旨一摺運河隄壩原以保護民居利濟
漕運如有河身淤塞及隄岸損壞之處自應隨時挑築
茲既據該署督勘明應行開挑河溝六處共計一千五
百餘丈建築加培隄壩十三處共計二千餘丈均屬險
要著照所請准其照估挑築所需工料銀兩卽在通永
道庫備貯要工項下動用該署督務當督飭工員認真
辦理毋任稍有侵冒此外如有似此應行挑濬者仍著

續行水金鑑卷百七

運河水

一

該署督詳查酌辦務於大雨時行之前俾各工均臻完
善免致泛溢

皇帝聖訓

卷

六月十七日費淳吳璣多隆武奏六月初九日後洪
湖清水增長河口通順催僱江西尾後漕船渡黃情
形業經臣吳璣多隆武會奏臣費淳由下游各廳查
勘工料亦趕至河口會同籌催查本年黃水長發較
早而洪湖底水過弱致河口倒灌停淤五月下旬黃
河長水更大益形灘淺舟膠雖經設法撈挖總屬時
通時塞臣等目擊情形倍常焦灼復同淮揚道和騰
額及熟諳河務廳員將備等再四籌議前經啟放峯
山閘水綫河後雖清水尙不敵黃而湖水漸增計日

已將外注必須豫籌疏導以助其勢當卽分派員弁先於禦黃壩上下東岸淤灘較厚處另爲抽挑引渠一道計長一千餘丈漏夜集夫豫挑如式以待清水長時導引暢出因上月杪至月初黃水未消轉恐引黃灌入是以未卽啟放直至初八九等日黃水消落尺許洪湖淮水長至七尺五寸清水漸向外出隨將運口三閘閉版擡蓄將所挑引渠啟放清水當卽滔滔下注並於河口淤處多用混江龍鐵篦子梳爬引溜清水乘勢刷沙立見通順連日湖水又長尺餘共長至九尺四寸更覺東注有力河泓漸次刷深臣等督飭江西糧道周璣押令各幫船加緊挽渡不任停

續行水金鑑卷三

運河水二

延計江西未渡黃漕船共三百八十隻又自洪湖出口之安徽宿州幫船四十六隻數日內連檣飛挽已於十六日全數渡黃挽進楊莊運口北上臣等添派幹員節節押催刻日速出江境臣多隆武親身押尾償行務令趕緊進閘赴通俟過天津再行回京

南河成案

續編

是年子牙河漫溢高家口決隄五十六丈署直隸總督陳大文築挑水壩引溜歸入正河剋期堵築奏畧文安積水四面周歷細勘因該處地居窪下河間高家口漫工現寬五十六丈口門水深五六尺至八九尺不等斜接上游正河止餘四分之溜施功不易必

須於正河西岸漫口上先築挑水壩一道挑溜正趨
歸入下游正河次將對面新灘順勢挑切使下游河
流暢順口門溜勢自減亦可剋期興工堵築共約需
工料銀三千九十五兩

畿輔
安瀾志

是年開挑河渠六處計一千五百餘丈培築隄岸十
三處計二十餘丈

畿輔
安瀾志

嘉慶八年閏二月二十四日吳璥吉綸奏二進糧船於
十七日過淮及起剝渡黃緣由先經臣吉綸恭摺具
奏連日東南風順渡江之船迅利截至二十二日止
上下兩江省幫船全數挽入瓜洲口浙船亦次第跟
渡計三進僅存二十餘幫未經過江惟黃河交桃汛

續行水金鑑卷二百

運河水
三

後節次報長洪湖清水交滙處所衝刷究不能得力
兼之一遇東風即將湖水刮回致口門愈淺自十九
日起幫船未能暢渡臣等目擊情形不勝焦灼復督
同道廳相機添築小壩逼溜刷淤一面多備剝船大
加起卸二十五六二日黃水更長倒灌口門因即趁
溜催過太倉後幫船七十七隻甚爲平穩但究係借
黃濟運不能久恃一經水落沙停仍然阻滯現在籌
商將洪湖五道引河及束清等壩趕緊拆展俾清水
暢放再傳齊各幫水手及兵夫人等用鐵篦子混江
龍分投往來梳爬以期日見深通源源接渡再臨黃
各工臣吳璥先經嚴飭廳營加意防護現俱一律平

穩奉

硃批加意慎重務期萬全

南河成案續編

八月二十九日吳璈奏中河廳屬桃源汛挑挖淤淺工程先經臣與前督臣費淳奏明估需土方銀兩造冊具題茲奉部駁以臣初次奏報回空漕船摺內止稱邳宿運河各段淤淺應行挑浚並無桃清中河字樣迨二次奏報率將中河桃清工段牽連增入預爲冒銷地步伏查此案挑工嘉慶六年經前漕臣鐵保巡漕臣廣泰以江南境邳宿桃三汛河道淺澀應早挑浚以利漕運會摺具奏奉

上諭鐵保等奏江境從臺莊至黃河口三百數十里自

乾隆五十年挑浚後迄今已越十六載未經挑挖內如邳州境內之貓兒窩宿遷境內之窰灣陸家墩桃源境內之古城溜各處因歷年淤積一時勢難深通又邳宿境內駱馬一湖近年因運河高仰不齊放水不暢其通河各引渠亦復淺阻再嘉湖蘇常一帶亦間有淺阻俱於漕運有礙請飭交各該督撫設法趕挑以利新漕等語所奏甚是向來河員積弊往往借名興工爲侵帑地步固應力爲飭禁但遇有緊要工程原應隨時辦理惟在司事者各矢天良實用實銷不在沾沾靳惜小費也至漕船經由之地淺澀處所自應隨時挑挖若爲惜費起見置之不辦年復一年淤塞更甚不但於漕運有礙

設遇大水年分盛漲無所宣洩必致衝壞隄防於各該處民廬田畝均有損失彼時始議興築疏浚所費轉鉅是日前意圖節省而日後倍糜帑項卽爲惜費計亦不應出此著費淳吳墩岳起阮元卽查明江浙境內凡關係運道淤淺處所卽行逐段挑挖務使一律通暢以利漕運但須核實辦理勿致稍有浮冒欽此臣當卽會同督漕二臣督飭淮徐淮揚兩道將運河中河淤淺之處逐段測量勘估務使一律挑深以資速漕利運惟是運中兩河淤淺情形不同勘報遲早亦異緣中河在運河下游運河地勢較高淤淺易於勘驗是以當年十月漕船回空時該河卽形淤淺臣隨經附摺奏

明分別挑浚彼時中河桃源汛各段淤淺尙未涸露不能同時勘估是以初次摺內亦未敘入迨十二月上游運河築壩興挑下游水勢消落露有淺土復經臣於新漕首幫渡黃摺內同邳宿運河各段古淺附摺奏報一律興挑次年正月工竣又於恭報新漕首幫出境摺內奏明此桃清中河挑浚淤淺工程先後具報之原委也此案挑工自運中交界以下卽係前漕臣鐵保等原奏所稱桃源境內之古城溜地方該處一帶河底悉係砂礮崗淺水勢溜急俗名古城溜是以漕臣奏請同邳州境內之貓兒窩宿遷境內之窩灣陸家墩等處一併查明挑挖因其淤淺係先後

涸露故情形亦先後奏報是摺雖兩次而奏明則一
理合查案分晰聲明所有中河挑工原估土方銀九
千六百三十三兩零仍請照估准辦於漕運實有裨
益奉

上諭前因工部奏吳璥題估桃清中河挑淺工程係牽
連增入請旨飭查茲據吳璥奏先經前任漕臣鐵保等
奏桃源境內之古城溜等處歷年積淤曾奉諭旨令該
督查明挑挖現在桃清中河卽係該處地方並無朦混
增添等語此項工程旣係遵旨興挑著照原估准其辦

理

南河成
案續編

九月二十二日鐵保奏豫省封邱汛大隄蟄塌下游

續行水金鑑卷三

運河水
六

漫入直隸山東接壤處所穿灌運河臣於月之二十
二十一等日奉

諭旨令臣於校閱營伍時就近查勘運道並附近田廬
據實速奏欽此臣先於十九日據署濮州知州周履端
稟稱十五日州境滌河魏河等處忽有黃水自西南
直下間或出槽漫溢范縣直達張秋運河現在加築
隄堰臣時已回省城卽飛飭兗沂曹道魏成憲曹州
府錢杰速往查勘二十日接該道稟稱豫省封邱汛
漫口已開大河水勢陡落已親駐曹工加鑲保護隄
根又據該府稟稱荷澤趙王河毛湘河猝有黃水漫
入濱河之甘露集李村集被水房屋間有坍塌現至

鄆城南隄口等處幸水勢倒漾不甚湍急該府親督
荷澤縣知縣曹吉履趕緊堵禦並據范縣壽張縣具
報臣以民瘼所關親往查辦且黃水既入運河卽難
免淤墊尤應查勘豫爲籌備除飛札運河道高三畏
糧道崇福逐段查勘並委參將八十守備楊聯萼星
夜嚴催回空南船出境以便東省糧船及早兌開無
誤挑濬臣於二十二日親往東昌張秋一帶先勘運
河並督道府等親赴被水地方查明如有應行撫卹
妥爲辦理

運河
道冊

是月二十三日莫瞻菴奏豫省黃河北岸衡家樓漫
口蒙

續行水金鑑卷二百七

運河水 七

皇上特派廷臣前往籌辦自必趁此立冬水消趕緊堵
築以冀仰慰

宵旰憂勞臣愚以爲黃河漫口宜及時籌畫而運河緯
道亦宜早爲防護從來豫省北岸衝決鄰省至近者
則大名首當其衝向東則曹兗濟寧被災尤甚而被
災州縣中凡有逼近運河者隄堰必遭衝刷今黃河
旣已疎防運河豈可不籌搶護惟運河雖小於黃河
而從前竟有不容人力搶護之時今年則人力猶有
可爲查乾隆四十六年青龍岡隄工未潰以前五六
月間大雨傾注四十餘日濟寧金鄉魚臺一帶平地
積水至二三四尺深者至七八尺與昭陽南陽微山

獨山諸湖滙成一片早已湧及運河隄根及七月初一經決口大溜灌入緯道全行淹沒彼時運河同知羅煥因值運艘回空南下令各縣間段擺列船隻以當緯道無如被淹居民正值被水逃生各湖魚船尙不敷村民雇用况巨浸瀰漫俱成渾水卽土人習水者亦不能辦何處爲運河正身不惟雇船甚難卽擺緯亦屬無益及至重運北上俱約畧故道而行千里內汪洋無際一遇暴風大雨船無靠傍猝被吸入湖中沙灘淺攔旋渦沈覆者曾經見諸奏報其口門工程五年始竣而運河舊隄早歸烏有興工名爲修復實則同於創造嗣於六十年及嘉慶三年之曹工睢

工兩次衝決雖堵築施工比青龍岡爲易而事後復修運道不免大費周章至現在局勢與當年大不相同封邱決口據所報由於南隄內湧出沙嘴逼令河水北向又值南風大作所以北岸潰決查前此祥符六堡險工由於南隄沙噴南風倒捲南岸因得決而復閉是前月幸保無事卽爲下月受病之根以臣所聞並非黃水十分浩瀚卽十二日驟雨勢猛其入地不過三四寸亦非能助河流洶湧之勢今年山東並無大雨積水現屆初冬水勢消滅之期其漫及下流者地方寬廣則力緩而勢散或可冀其不至逼運卽令掣動湖水浸及運隄當不至遽行漫過隄頂立卽

坍塌自應趁此未甚決裂之際

敕下山東撫臣督屬詳勘隄身如有單薄緊當溜勢卽鑲埽幫護防其汕刷有低矮易淹者卽加料堅築防其衝決或有已經坍塌者趁其尚未刷寬添椿補築務期相機搶護俟漫工合龍漕船入境俱得循隄直進不致阻礙似此及早間段施工比潰後普行動工經費亦可節省是日奉

上諭本月十八九兩日嵇承志馬慧裕先後奏到河南衛糧廳衡家樓大隄蟄塌掣動大溜水勢向東北趨注下游與山東曹州等屬毗連節經降旨飛飭鐵保查勘是否有礙運道並查明田廬人口有無被水成災迅速

具奏迄今已閱六日本日復據嵇承志等奏該處東西兩岸汕刷口門寬至一百八十餘丈現已稍定盤頭裹護可以施工其下注之水於十四五兩日由考城蘭陽西隅經沙河入山東境等語何以十九日該撫發摺尙未奏及想係地方官稟報遲延所致黃水衝淹爲害甚大地方官自應立時稟報刻不容緩乃東省州縣並不早行具報殊屬延玩鐵保應查明參奏至鐵保接奉前旨諒已馳赴該處現在黃水下注曹州所屬經由何縣地方田廬被淹多寡人口有無傷損一面奏聞一面妥爲撫卹該處臨近運河隄堰是否衝刷於運道有無阻滯前會降旨詢問本日據莫瞻棻奏豫省北岸衝決恐

於運河有礙應及早詳籌搶護又據嵇承志等奏回空漕船截至本月初十日在濟以北者尙有十七幫約於未經漫口前可以償行出境著鐵保督率道員親往履勘運河回空漕船行走有無妨礙其沿河各工如有隄身單薄緊當溜勢者卽鑲埽幫護其隄身低矮恐被淹浸者或加料堅築儻竟已經坍塌亦應乘其尙未刷寬添椿補築該撫務期相機搶護及早籌辦勿使運道稍有阻礙仍著將履勘情形先行迅速具奏所有莫瞻棻原摺著發交閱

運河
道冊

是月二十四日鐵保奏臣於二十三日行至東昌見運河水勢異漲間有出槽漫溢幸大溜不甚湍急尙

續行水金鑑卷百七

運河水
十

不致衝突臣卽沿河履勘至張秋七級閘水已漫隄探查曹濮下游之水由壽張沙河入運現經啟放對岸之平水三閘五空橋滾水壩及各減水閘壩俾資宣洩柰上游來水甚大運河一帶拍岸盈隄卽飛札沿河地方官會同河員竭力搶堵臣原擬查勘運河後卽往曹濮籌辦撫卹茲因運河水勢緊要臣嵇承志遠在豫省不能兼顧臣連夜回至東昌沿河查勘其曹濮被水較重地方已委員帶銀馳交兗沂道曹州府酌辦並暫撥銀米委員解赴壽張張秋先行接濟飭委藩司陳鍾琛親往查核至回空尾幫已抵東昌臣委員持令催償惟張秋口門水大溜險俟消落

方可前進

運河
道冊

是月二十五日奉

上諭鐵保奏稱十五日濮州地方忽有黃水自西南而下由范縣直達張秋運河現在加築隄堰又荷澤縣猝有黃水漫溢濱河甘露等集被水現漫至曹州府城之南幸水勢倒漾不甚湍急等語此次豫省北岸漫口朕卽慮及東省運河必有妨礙當經降旨令鐵保親往查明迅速具奏乃閱奏到摺內但云黃水直達張秋並未將水勢或卽由運河行走抑僅止穿過運河之處逐一聲敘其所築隄堰是否卽於漫溢處所施工抑於未經黃水地方先爲籌備若論已漫之處水勢必形浩瀚恐

續行水金鑑卷二十七

運河水

十一

亦未能立時堵築又曹州城南旣稱倒漾則非正溜可知是黃水大溜究往何處經行亦未詳悉奏聞種種殊欠明晰且於十九二十兩日接據各屬稟報直至二十二日兩次接奉諭旨始由尋常馬遞覆奏亦覺遲緩看來該撫於河防事宜未能諳悉况東省旣有漫淹小民蕩析離居亟應拯救而運河一經黃水衝灌必有淤墊於運道大有關係朕刻深廛念豈封疆大吏轉存忽視乎鐵保現已親往查勘著卽將以上所指情節並黃水由何處入東省地界漫及運河若干里由何處出運其下游由何處歸宿入海現在作何籌辦俱詳悉繪圖貼說馳奏其被淹各村莊迅速查明妥爲撫卹勿令失所

是日鐵保奏月之二十四五兩日運河水勢不見增長漸就平定查溜勢已由張秋迤南五空橋各閘壩東注鹽河至利津入海是以張秋迤北各隄堰如七級裴家嘴等處雖有漫溢可免衝突臣現督沿河文武竭力搶護儻衛水不長閘內之水向北暢流於緯道尚可保護惟張秋蓮花池南壩頭至五里鋪溜勢甚大河坡一片西岸俱有漫口人力難施且大溜正入鹽河若早堵閉轉致逼溜入運惟有於兩頭裏護不令刷寬俟上游水勢稍減卽時補築至回空南船尚有十幫未過張秋現委濟南城守營參將等專駐

張秋一帶會同催償各員妥速挽渡再被水州縣以荷澤濮州壽張爲重現據道府督同州縣買備簍餅紮筏濟渡居民委員酌賚銀兩並於東昌濟寧多購雜穀運往接濟專委藩司會同道府撫卹其被淹田廬及人口有無傷損俟水退卽行查實具奏至鹽河下游地方黃水經過難免被災臣已札查歸案辦理至各州縣稟報遲延容臣查辦再查被水州縣應徵錢漕定難如限徵收各州縣恐兌解遲延紛紛具稟臣諭以地方旣被水災總以加意拯卹安撫人心爲要其應徵各項自宜緩催俟查明輕重情形分別奏

天恩再飭欽遵辦理

運河道冊

是日鐵保復奏黃水大溜在張秋橫穿運河致東西兩岸俱已衝壞直奔鹽河入海河坡一片俱係分溜漫入運河是以東昌臨清一帶尚可保護此時水走鹽河猶是大幸臣看現在情形豫省漫口不開張秋漫口不能不開所慮鹽河下游經由地方難免受累已飛札各州縣確查有無被淹輕重情形再行核辦至莫瞻菴所奏俱極周到臣已率同河道及東昌府知府親督沿河各河員州縣無分畛域遇有低薄處所卽培高加厚不但備現在漫溢並須計明歲春汛臨時難以猝辦

運河道冊

續行水金鑑卷百七

運河水 三

是月二十八日鐵保奏臣於二十七日奉

上諭以臣二十二日具奏一摺殊欠明晰著將指出情節詳細繪圖貼說馳奏查二十二日係甫據稟報大畧情形是以陳奏未能明晰實深惶悚嗣於二十四五兩日節經臣將履勘查辦情形由驛具奏茲復查黃流由直隸東明入濮州境向東奔注經范縣壽張沙河入運在張秋鎮之南其由濮州漫溢之水西南漾至曹州鄆城入趙王河與沙河匯成一片直穿運河東岸下注鹽河入海自張秋迤南至五里堡寬二十五里隄岸多有衝塌張秋迤北運河所受俱係漫水並非正溜至二十六日漸已減落臣於黃水大溜

既入鹽河後卽派員跟水趲看並札經過州縣隨時馳報現報東阿東平平陰等州縣沿河地方間有漫溢自長清以北則河身寬大連日水長一丈數尺尙未出槽地方官節節防護不致有礙田廬至前奏濮州在本境加築隄堰係十五日黃水初至情形嗣則大溜奔注實難抵禦所有各州縣被災地方已發銀備穀專委藩司陳鍾琛會同兗沂曹道魏成憲親督府州縣妥爲撫卹俟查明被災輕重請

旨辦理至未過張秋之回空南船十幫臣面諭捕河通判同委員及漕務各官雇船於旁流稍緩處察探水勢再運河自張秋迤北至臨清隄身單薄居多目今

僅受黃水支流趕緊搶護雖保無虞祇係一時補苴至明年春汛或上游堵築需時卽係支流亦不能敵迥非迤南一帶運河藉有湖櫃宣洩可比查兩岸官工民堰就現在情形總須大加培築莫瞻棗所奏大有所見惟現在河臣遠駐豫省不能兼顧運河道高三畏非河員出身不諳工作臣於河務實未諳習斷不敢自是而東省司道中亦無素曉修防之人儻辦理稍不如法所關匪細查江寧藩司康基田久任河工於修築要務最爲認真仰懇

皇上天恩速飭赴東同臣等相機熟籌酌定章程趕緊妥辦又查有丁憂回浙之原任淮徐道徐端由東省

河員出身曾任兗沂曹道後任淮安府知府臣深知其熟練有爲請

旨卽令迅速來東督率各委員監辦一切築濬事宜更於隄工有益俟工竣後令其回籍守制至一切應需工料銀兩統俟康基田徐端等定議後臣再設法籌

款遵行

運河道冊

是日奉

上諭本日早間據鐵保奏查勘運河被水情形一摺聲敘仍未明晰又未繪圖貼說呈覽朕心深爲廑念正在降旨飭諭間未刻又遞到鐵保四百里馳奏之摺始知黃水大溜在張秋橫穿運河東趨鹽河至利津入海並

續行水金鑑卷三

運河水

五

不直注運河尙爲不幸中之幸閱之稍慰惟閱圖內蓮花池漫口係在張秋迤北據稱水勢連日稍平漫口之水又係下注何處現在水勢旣平是否可以先行堵築保護張秋迤北之運河勿令再往北趨著該撫卽派員查勘妥協辦理張秋迤北各處隄堰均應督飭搶護至漫口處所業經裹護兩頭俟水稍減再相度形勢酌量妥辦其荷澤濮州壽張各處及沿河下游兩岸被水地方著卽分派委員直至海口迅速查明被淹地畝場竈妥爲撫卹勿任稍有失所其被水州縣應行緩徵之處俟查奏到日再降恩旨惟回空糧船尙有十幫未過張秋經鐵保派員催償設法挽渡此則應須慎重現在張

秋迤北緯道雖尙可保護而河坡相連一片溜勢甚大該撫當飭令各員弁加意小心設法行走仍將何時挽過幾幫是否不致守凍隨時速奏茲已令費淳帶同王念孫馳赴山東查勘河道情形該撫惟當會同熟商妥辦嗣後奏報水勢情形均著用四百里馳奏以慰廑注

運河道冊

十月初一日奉

上諭鐵保奏到查明黃流穿運入鹽河歸海並被水州縣各情形一摺覽奏俱悉此次黃水穿過運河據稱自張秋迤南至五里堡長二十五里隄岸多有衝塌等語是河流穿運處所水勢甚大此二十五里之內河坡相

續行水金鑑卷二百七

運河水

六

連一片現在回空糧艘十幫尙未挽過爲目前最急之務該撫派員雇覓小船於旁流處所察探水勢照從前北河籌辦之法挽渡是否穩便現已渡過若干幫卽行具奏總須妥爲籌畫俾及時挽渡不致守凍貽誤爲要至豫省漫口處所昨據嵇承志等奏已經盤頭裹護溜歸中泓奔放之勢漸減俟有就緒卽當興工等語如今冬果能堵築合龍河歸故道固屬甚善儻因天寒日短不能急切竣工則來年重運北上未免仍虞阻礙此則尤關緊要急應豫爲籌計昨已面諭費淳令帶同王念孫馳往專爲勘辦運河豫籌運道情形該撫當會同熟商設法籌辦務使轉漕不致有誤仍將如何辦理之處

隨時速奏至所稱張秋迤北隄身單薄應大加培築固
係應辦之事然非當務所急且各項經費業已不少尙
無暇及此祇可徐爲籌辦其東省應需料物該撫仍當
及早購備以便隨時應用至請調康基田徐端二員康
基田雖曾任河督然河務非其所長且又年老徐端熟
悉河務但南河現有應辦事宜前已降旨令該員於回
籍百日期滿後仍署理淮徐道事務亦不便遽行調往
此時已派費淳帶同王念孫前往自可幫同經理也其
東阿東平平陰等州縣沿河漫溢地方仍卽飭令委員
速行查勘如有應需撫卹之處奏聞妥爲辦理

運河
道冊

是月初二日鐵保奏九月二十八九兩日東昌迤北

續行水金鑑卷二百七

運河水
七

水勢漸落水色不甚渾濁衛水未長臨清閘口宣洩
尙暢各隄岸低薄處已經各地方文武河員集夫培
築未過張秋回空幫船現據參將八十等會同漕員
帶令丁舵水手於西岸漫水坡內逐段測量插立標
記依此放渡並用小船分段照料行走尙屬平穩已
於本日挽渡過杭嚴四幫船三十六隻後船跟接前
進鎮臣博奇已由戴廟一帶迎提臣將設法挽渡情
形專札知會囑其妥速督辦儻數日內不經風雨定
可渡竣較去年回空過東昌之期尙無遲誤

運河
道冊

是日鐵保又奏臣九月二十五日復奏一摺欽奉

諭旨蓮花池漫口在張秋迤北現在水勢旣平是否可

以先行堵築保護張秋迤北之運河著卽派員查勘妥協辦理並查明被淹地畝場竈妥爲撫卹欽此查黃水驟至分溜下注運河張秋迤北至東昌一帶盈隄拍岸蓮花池係漫溢之水非大溜衝決可比水勢旣平過水亦漸少漸緩已嚴飭地方官會同河員堵築於張秋迤北之運河實無妨礙至鹽河兩岸當衝之東阿東平平陰被淹處所已查明歸案辦理下游之長清齊河歷城濟陽等州縣據報河道甚寬未經漫溢田廬惟青城下至利津三縣雖據本省人稱下游河道亦寬勢尤窪下不致漫淹但尙未據報已三次嚴札查詢並委員探訪是否因水阻隔抑該縣等玩誤

查明參辦場竈有無被淹已札運司督屬查明歸案辦理至一切挑濬堵築事宜俟費淳王念孫抵東後再與察看情形熟商定議

運河道冊

是月初五日奉

上諭鐵保奏運河漫水已平阻水空船前幫已過張秋一摺回空運船關係緊要前據鐵保奏尙有十幫未經挽過張秋深爲廩念茲據稱挽過幫船三十六隻行走平穩其餘各幫亦俱依此前進不致貽誤猶屬不幸中之幸覽奏稍慰此時運道最爲急務鐵保惟當督率派出之員小心護送務將所有幫船迅卽全數挽渡隨時速奏以慰廩注其鐵保派出委催之參將八十等員及

總兵博奇如果辦理奮勉將來幫船全數渡竣一無損失著鐵保據實保奏當加恩給以議敘昨據嵇承志等奏到封邱汎漫口水勢稍平現在築立壩基開挖引河已於本月初三日興工僭辦若辦理迅速早得合龍則東省疏通運河更屬易辦但堵築工程爲期難必此時費淳鐵保惟當察看情形豫爲經理總期於明年重運無阻爲要至另片所稱蓮花池漫溢之水非大溜衝決可比於張秋迤北運河實無妨礙等語前據鐵保奏到張秋迤北黃水盈隄拍岸隄身單薄應卽大加培築朕卽以此雖應辦尙非急務惟當先行籌辦運道今果據該撫自言過水地方漸少漸緩實於運道無礙可見前

次該撫接據地方稟報未免稍涉張皇此次東省水勢漫溢皆由封邱汎開決口門黃水下注其咎自在豫省諸臣與鐵保無涉無庸畏懼惟當將運道隄工及地方賑濟事宜安心經理次第熟籌以期悉臻妥協方爲無負委任又另奏酌留漕糧以備賑濟此次東省各州縣及衛地被淹處甚多鐵保請將閘內各州縣漕糧除現在被水荷澤等處緩徵外其應行起運州縣之米麥豆十一萬餘石酌留本省賑濟著照所請辦理至所稱現在所需銀款及修築運河隄岸各經費亦應籌及請以山東力量辦山東事宜等語此時東省需費浩繁斷無再將該省銀兩撥往他省之理自應照該撫所請就近

撥濟但藩運各庫現在存銀數目未據聲敘著鐵保查明該省現存銀數若干及各項需費若干據實具奏再前據長麟奏請乘冬令黃水微弱時由運河南岸泗水魚臺等處相度形勢趕緊疏通引歸微山獨山南陽駱馬等湖及沂沭等河暢其宣洩已將原摺交費淳帶往與鐵保商酌勿存成見朕於長麟奏上後復周諮博採廷臣中無一人以爲可行惟長麟獨執此見看來竟不可行黃水下注東省設令引之泛濫各州縣再行歸湖勢仍必灌入運河焉能保護運道况現在黃水由鹽河入海若又欲引之入湖亦殊不易本日鐵保摺內稱鹽河兩岸下游如長清齊河歷城濟陽各州縣河道甚寬

尙無漫溢田廬之慮亦祇可聽其其順流歸海所有長麟前議想費淳等自不爲所惑也又鐵保奏請留東差委各員除洪梧一員現在京患病無庸發往外餘俱照該撫所請降旨准行矣

運河道冊

是月初六日吳璥奏初五日臣奉

上諭現在封邱汎漫口大溜全掣漫及直隸長垣東明開州並東省曹濮荷澤等州縣至張秋地方穿過運河匯注鹽河入海其江南下游水勢自日見消涸該省清黃交匯處所爲漕艘必經之路今黃水斷流恐運河不無淺阻來春重運北上若豫省漫工已早合龍河歸故道自可無虞儻年內未能葺事屆期必至阻滯自宜豫

爲籌畫俾重運不致貽誤卽著吳璥於清口一帶酌量籌辦並將現在情形及如何辦理迅速具奏至江省由清口至徐州以下黃河斷溜恐多淤墊亦當乘此水涸或逐段挑挖或酌抽溝槽俟黃流順軌下游不致高仰方能暢達無滯再前因豫省本年收成稍歉所有應用稽料曾令吳璥於南河淮徐等屬代爲採辦由水道運往本日據嵇承志等奏漫工需料尙可於本省各州縣設法招集購辦無須直隸協濟以省運價等語是豫工既能就近購備將直隸協濟之料奏請停止則南河亦可無庸採買著傳諭吳璥卽行停止不必購料運送豫工欽此臣查清黃交滙處所籌辦淤淺大概情形業會

同漕臣吉綸具奏緣河口一帶九月下旬黃水陡涸竟成平灘當經趕挑引渠清水始得下注無如水落沙多此通彼塞一日之內變遷數次臣同吉綸目擊情形倍常焦灼旬日來親率道將督令弁兵或用混江龍以助其力或築做草壩安紮木把以順其勢隨溜行之趨向酌導引之機宜溜勢日見暢達河槽始見刷成自禦黃壩至彭家馬頭以下水深二三四尺不等十月初四日漕船陸續放渡連日東北風利其僂渡漕船七幫連前共已渡黃十五幫此後河泓若無遷徙自可漸刷漸深而溜行甚急緯挽維艱再得風色順利船行自速雖未渡幫船尙多而河口已有

成效人力尚有可施總當設法僭行務期無誤歸次
惟豫工漫水由張秋穿運入海恐未必由閘河分注
南來儻年內未能蕨功來春重運北上時江境運河
淺澀勢必阻滯誠如

聖訓亟宜豫爲籌辦臣與吉綸率同道將等悉心講求
此時洪湖雖尙存水一丈一尺三寸但冬令水枯有
消無長且清口以外悉成空河以寬濶二三百丈淮
黃並行之河僅賴淮水鋪灌不特難冀充盈更恐建
瓴直瀉必致一洩無餘而楊家莊以北運中河之水
江境並無來源專藉微湖挹注更爲微弱兼之楊莊
運口外又無黃水頂托尤慮淺涸現在通盤計算惟

有及早蓄水隨於清黃交匯處迤下相度形勢南岸
之彭家馬頭北岸之楊莊運口以東孫家莊地方爲
南北兩路之水總匯處所河面寬三百餘丈必須於
此處趕築束水大壩酌留口門二三十丈使清口楊
莊兩股來水到此一束則水有擎托庶不致宣洩過
多不但目前回空漕船得力卽明春重運到時或黃
水尙未歸故道而清水得此擎蓄尙可冀其敷裕以
資浮送該壩現已築成一百四十餘丈連日水勢已
見擡高船可通行卽其明效仍在趕緊接築一俟辦
竣量驗實做工長丈尺動用料物錢糧若干再會同
督臣陳大文核明確數開單恭呈

御覽斷不任工員稍有虛一月至河口以內向有束清禦黃兩壩及運口頭二三平壩爲湖水收蓄關鍵現亦相機築做收窄俾多留一分之水卽多得一分之用惟楊莊以北運中河水勢尙須探明上游漫水如由濟寧以南運河分注而來則充滿有餘尙應分洩如竟無南注之水則淺阻堪虞應如何蓄水挑淺俟回空全數渡竣後再與漕臣吉綸確勘妥籌另奏辦理其由清口上至徐城黃河臣於黃水斷流後卽委員分投測探存水深淺較量河底高低雖多有淤墊尙不至如從前曹工邵工停淤之厚毋庸普律估挑以致需費過多惟應擇其實在淤淺高仰處酌量分別挑挖抽溝統俟漕船渡竣後臣親往確勘固不敢多糜錢糧亦不敢稍任貽悞至協濟豫工稽料仰蒙諭示豫省尙可設法招集購辦毋庸江省協濟臣遵卽飛飭徐州道府停止購運知會督臣陳大文一體轉飭遵照

南河成案續編

工應請俟河水再落後挑淤培隄工力較省已批令
多備料物相機妥辦

運河
道冊

是日鐵保奏本月初二日杭嚴四幫船隻挽過張秋
漫口經臣由驛具奏續將杭嚴頭杭嚴二海寧所三
幫照前設法挽過張秋漫口歸入正河銜尾南下在
後尚有湖廣六幫亦跟接前進參將八十帶同衛守
備相機提放河營外委在前帶緯引導衛千總等分
駕小船於坡水中節節防護是以溜勢雖險行走尚
穩臣復將奉到

諭旨移知鎮臣博奇張秋一帶親身察探水勢慎重照
料如風勢順利在後各幫數日內即可渡竣

運河
道冊

續行水金鑑卷二百七

運河水
志

是月初十日奉

上諭鐵保奏報浙船全過張秋一摺覽奏稍慰回空運
船關係緊要今據鐵保奏稱連日復將杭嚴頭杭嚴二
海寧所三幫設法挽過張秋漫口歸入正河業經銜尾
南下尚有湖廣等幫亦均接續前進可以不致遲誤等
語鐵保派出之參將八十等員及總兵博奇於運船經
過時能節節防護相機提放照料尚為安速所有摺內
在事出力人員已俱用硃筆圈出著鐵保俟各幫全數
渡竣一無損失卽行奏聞以便交部議敘再查明此外
有無出力人員一并據實具奏並著鐵保傳知該員等
以此次伊等辦理挽運回空糧艘出力業已降旨查明

加恩至明年重運經臨更關緊要現在豫省封邱漫口已興工儻辦如果合龍迅速固屬甚善設或稍緩時日彼時重運來時爾等更當加倍奮勉相機設法妥爲照料俾得儻行無阻如果辦理妥協另當據實保奏自必更邀恩敘俾該員等益加鼓勵又另片奏張秋迤北各隄工俟河水再落後辦理等語張秋迤北一帶此時黃水驟至自不免漫溢將來河水一落又恐運道淤淺再楊莊以北至臺莊一帶中運河向賴黃水頂托方能濟運此時河道恐有乾淺前已派吉綸幫辦但吉綸督辦兌運不能在彼久駐將來吉綸往辦漕務時所有運道經行之處在南河境內者責成吳敬辦理在東河境內

者嵇承志勢難兼顧著交費淳會同鐵保並帶同王念孫妥爲辦理務將一切蓄水挑淺事宜詳細經理總之漕船往來係目前要務若不先爲籌及臨時必致周章想費淳鐵保自能熟籌妥協也其另片稱附近東阿之肥城等州縣尙有續被漫水各村莊等語該處雖祇漫溢之水亦應田廬被淹現在鐵保派鳴清前往履勘著飭令據實呈報不可諱飾

運河道冊

是日奉

上諭據吳敬奏籌辦漕艘通行並豫籌接濟新運及疏浚黃河下游各情形覽奏俱悉現在清黃交匯河口一帶淤淺經吳敬等督率弁兵挑渠引流已蓄水至三四

尺漕船僂渡過六百八十餘隻河口業經辦有成效糧艘隨幫續渡可期無誤歸次所辦尚妥惟是今歲回空之船裝載本輕便於緯挽尚易爲力轉瞬春融重運北來彼時封邱漫口應期合龍運河一律通暢無淤舟行順利固屬甚善設歲工稍遲運道淺澀不能浮送重運則關係甚鉅該督現於孫家莊築壩束水使清水不致宣洩過多並將運口各壩收窄蓄水自皆係目前相機籌辦之法但洪湖微山各湖水是否敷用總須通盤籌畫實能濟運方爲萬妥清口一帶本係專交吳璥辦理其楊莊以北中運河地方曾交吉綸前往籌辦但卽日重運開兌漕務一應事宜皆須吉綸經理所有運道經

行之處在南河境內者專責成吳璥設法妥辦在東河境內者嵇承志一時不能兼顧朕已諭令費淳帶同王念孫屆時前往辦理該督等惟當趁此時河水未涸將一切蓄水挑淺各機宜先時悉心計算務使全河暢達通行無阻此爲至要至黃河下游斷流處所應分別挑挖抽溝不令高仰以俟河流順軌復歸故道吳璥卽遵前旨確勘妥辦可也

南河成案續編

是月十四日費淳鐵保奏臣費淳帶同王念孫行抵東昌將運河水勢及催過空船幫數陳奏卽會同臣鐵保赴張秋一帶察看形勢相機籌酌如果豫省漫口早得合龍東省築隄挑淤尚可趕辦惟時已冬令

轉瞬重運北來有亟須就現在情形計議者查向來黃流挾沙而行中溜刷成深泓兩旁必淤沙灘此時穿運處黃水計寬二十餘里本年回空或水未消落尚可沿坡挽渡將來漫水漸消溜勢歸槽河寬不過二三里其餘盡成沙灘運河南北兩口必爲所淤且汶水被黃流橫截不能北注張秋運河二百數十里水無來源勢須引黃濟運又恐節節停淤此歷來黃流穿運河道必淤載籍頻書總無善策誠如

聖諭東省籌辦運道爲第一急務臣等連日妥議博稽從前封邱漫口由張秋穿運入海辦理運道成案參以近今形勢當此水勢浩瀚應先將張秋南口竭力

裹護今議於西岸舊有裹頭幫鑲寬大東岸舊有長隄加高培厚以防溜勢北掣並可收東漫水誌認口門將來水如歸槽察看淤沙淺深酌挑月牙引河於南口則趁汶水北注之勢引歸河身於北口則自大溜迤北分導餘流以資挽運惟活沙所積旋挖旋淤仍慮淺阻今議照南河刷沙法製造混江龍鐵篦船及挑淤器具並咨調衛守備李仁同南河熟悉守備千總二三員帶河營効用十名來東指授河兵辦理俟江浙重運將入閘河凡東省剝船調齊張秋以備剝淺之用儻水勢旺長河流仍寬則照今年挽渡空船法派熟悉將備兵弁於溜勢稍緩處探路插標分

段照料總俟臨時辦理以期無誤重運至張秋迤下隄岸經漫水汕刷有礙緯道者應於今冬水退後同險要各工分段培築所需經費臣等咨商速辦再正在籌議間奉

諭旨一道並莫瞻菴奏摺著臣等察看情形妥籌經理奏稱黃水衝開運隄恐大溜吸動頓形乾涸又恐餘波倒灌突起淤沙請於入黃出黃處添設兩閘查漫水迤南舊有戴廟安山等閘漫水迤北舊有荆門阿城七級等閘現在水與閘平版俱啟放若下版驟閉正恐停沙轉妨運道清口迤南運河係南流入江並非北流入黃而京口之運河係大江清水入運此時

續行水金鑑卷二百

運河水

三

張秋迤北之運河則係黃流濁水入運是漫口南北情形與清口京口不同所請添設兩閘應毋庸議再回空糧船已過張秋運河事宜經臣等酌定章程臣費淳卽遵前

旨帶同王念孫由水路赴臺莊查看水勢並一應備辦各事臣鐵保因藩司在曹州各屬督辦災賑所有沿河下游宣洩事務必須親往核辦並順道回省籌備各項經費仍會同臣費淳將一切河道熟商辦理

道冊

是月十七日奉

上諭費淳鐵保奏回空糧船全過張秋及籌辦運道各

事宜覽奏慰悉所有照料空運安速之總兵博奇等已另降諭旨分別加恩矣鐵保督率各員迅速挽運辦理尚屬認真本應給予甄敘但來年糧艘北來一切籌辦事宜更關緊要現已交費淳鐵保王念孫專辦俟彼時新漕各幫全數挽過東境再將伊三人施以重恩其所稱張秋西岸舊有裹頭現已幫鑲寬大東岸舊有長隄加高培厚並製造混江龍鐵籠船一切挑淤器具自應如此辦理目前東省急務惟以運道爲先至豫省堵合漫口工程甚鉅現已節次催令上緊辦理但費淳鐵保王念孫三人切勿豫存年內合龍之想若籌備稍有未周來歲挽運必致棘手惟應妥協辦理以待重運經臨

此次豫省河隄漫溢係嵇承志馬慧裕疎防所致於鐵保等三人無干若能及早會籌俾來年各幫重運糧艘駛行無滯則係費淳鐵保王念孫三人之功勉之至另奏費淳帶同王念孫前赴臺莊鐵保親往查勘鹽河順道回省一節汝三人俱離工所張秋一帶若有應辦之事又交何人督理鐵保係該省巡撫且藩司又赴曹州等處辦災伊自應順道回省清理地方諸務至臺莊一帶前降諭旨內原以卽日重運開兌皆須吉綸經理其東河境內運道著費淳帶同王念孫屆時前往此時重運尙未開兌吉綸自當在臺莊照料費淳不必前往王念孫於河務素爲熟悉卽馳赴幫同辦理所有應辦事

件由吉綸具奏費淳卽著仍駐張秋經理一切運河道冊

是日鐵保奏臣奉

上諭著將運道水勢及賑卹情形藩運庫實存銀若干兩山東力量是否足敷目下要需並此外有無另款需用現在如何設法調劑迅速具奏欽此查運河情形及幫船全渡張秋並災區懇

恩蠲賑已於十三四日陳奏東省現存銀兩臣前出省時知藩庫存一百六十餘萬兩運庫存九萬餘兩嗣後尚有續行解到及應行撥款因未得確數現飭藩運兩司詳查尙未覆到至現在十四五州縣被水賑卹所需雖未得戶口數目就前辦成案約畧核計按

續行水金鑑卷二百七

運河水 三

之現今情形除截留漕米十一萬石外約需銀四五十萬兩至運河工程此時上游未堵應築應挑尙難估計現止有議修之張秋迤南裏頭埽工及張河道北蓮花池裴家口等處漫口需費無多據運河道稟稱河庫存銀尙可敷用是山東力量辦目下要工不須籌款惟豫工堵合後修築張秋迤南隄岸五十餘里挑濬長河三百餘里所費不貲亦應早爲籌備臣現往利津查勘海口出水處所及各州縣被水輕重情形俟查明具奏後卽與司道等通盤核計除本年必需經費若干外有無盈餘再設法辦理

運河道冊

是日吳敬奏臣同漕臣吉綸於十月初十日接奉

諭旨豫省漫口雖已興工堵築然何時合龍未可豫必
來年重運北來經行濟渡當豫爲籌及務須悉心設法
疏刷使目前回空幫船得以安行歸次不致守凍而來
年轉漕亦無貽誤方爲妥善所有清口一帶著專交吳
璈辦理楊家莊及臺莊一帶著交吉綸前往籌辦該河
督等惟當分投督僱務令全河通暢無淤妥速濟運欽
此當經漕臣吉綸將清口漕船挽渡順暢並先赴臺莊
一帶勘籌緣由覆奏連日臣正在河口督率築壩蓄
水疏導淤沙茲奉

諭旨臣當卽恭錄飛咨漕臣吉綸欽遵辦理查清口一
帶經臣在楊莊運口下孫家莊地方築壩擊蓄並將

清口內各壩口門收窄不使宣洩過多自南岸高家
馬頭至北岸楊家莊水勢停蓄擡高測量長河水深
自三尺餘寸至五六七尺不等兼之連日風利每日
幫船挽渡一百七八十隻至二百餘隻截至十六日
連前已渡過船五十九幫共二千七百二十九隻其
楊莊待渡之船現俱渡竣通計全漕已過十分之七
其已入江境未抵楊莊漕船十四幫臣現同吉綸緊
催亦卽銜尾前進剋日渡河南下不致阻凍惟張秋
以北阻水之尾後十幫尙未據報行抵江境如月杪
及月初趕到天氣尙暖亦可無虞阻凍儻到境較遲
天寒已凍再行設法辦理此時空船入水較輕緯挽

尙易明春重運北上萬一封邱漫口葺工稍遲運道淺澀不能浮送則關係甚鉅今查洪湖高堰誌椿現存水一丈一尺三寸計黃水斷流已經匝月幸得各壩收束是以湖水潴蓄尙多雖三冬水必消落而設法收蓄不使過於枯耗則河口足敷浮送惟得莊以北至臺莊運中河三百數十里專藉微湖灌注聞東省本年秋雨稍稀收水較少而楊莊運口外復無全河頂托之水恐難免淺澀尤宜早爲籌辦臣先經飭道廳等將駱馬湖尾間五壩於大汛後築壩堵閉而本年沂河源弱存水無多現飭將沂水入湖引河設法疏通俾多收二分之一水明春多一分濟運之益其

續行水鑑卷二百七

運河水 三

各古淺及新淤處所亦飭道廳先往逐段測水深淺何處須挑挖疏通何處須築壩擊蓄並將各壩酌量啟放刻下河口既經通暢臣卽前往運中河查勘漕臣吉綸尙在邳宿臣至彼會商務使通行無阻

南河成案

續編

是月十九日奉

上諭鐵保奏稱該省藩運兩庫約計現存銀共有一百七十萬兩該省被水之十四五州縣除截留漕米十一萬石外約須銀四五十萬兩等語核之現存庫項不獨目前賑卹裕如且張秋迤南裏頭埽工及張秋迤北蓮花池裴家嘴等處漫口一切挑築工程均俟豫省上游

堵築漫口辦有就緒始行估費議修尙非急用此時應如該撫所奏就山東力量專辦山東事宜朕亦斷不將該省存項撥濟他省也再另摺奏買補截漕米石請緩至來年採買一節本年截漕米石例應照數買補但念沿河各州縣均被水災若一經採買市價必增於民食殊有關係著照所請緩至來年秋收後再行買補搭運

運河
道冊

是月二十二日奉

上諭吳璥奏河口待渡漕船僭渡已竣並豫籌運送新漕及勘估黃河淤墊一摺現在清口水勢暢順所有回空糧艘已挽渡五十九幫行走尙爲妥速其已入江境

續行水金鑑卷二百七

運河水
三

十四幫仍應上緊飭催務令銜尾前進及早歸次至在張秋以北阻水之尾後十幫前據鐵保奏到均已行過險處想吳璥尙未得信卽日該幫全數南下亦須節節儉催免致阻凍爲要再摺內稱洪澤湖水瀦蓄尙多不致過於枯耗惟楊莊以北至臺莊運中河收水較少現飭將沂水入湖引河設法疏通俾得多收一分之水明春多一分濟運之益等語所見甚是中河一帶節經降旨令吉綸王念孫妥爲籌辦吳璥旣已前赴該處著將河道情形詳晰查勘仍交伊等經理

南河成
案續編

是月二十三日鐵保奏黃水大溜全注鹽河設入海口門稍有不暢將來春水旺漲不但沿河田廬淹浸

更恐由張秋南北旁溢於運道甚有關礙十月十六日臣自東昌起程查勘沿河北岸二十一日馳抵利津查鹽河本濟水會汶入海之區自鑿會通河截住濟源並遏汶濟運後鹽河所受不過濟武兩府泉源坡水卽運河異漲啟閉宣洩其流亦弱是以河身雖寬兩岸隄堰歲久不修間多平行且冬春水小斷流爲衝途車馬所經多碾成槽道所以黃水初至時尙能容受及全流下注不能不漫溢也至利津蒲臺濱州及續報被水之霑化等處地近海口衆水滙歸被災獨重其餘經過各州縣亦間有漫溢連日海口宣洩甚暢水勢已消三四尺利津城至海口有百餘里

溜勢湍急船不可近其爲海口通暢可知現委原任濟東道崔映辰候補知府鳴清候水勢大落督同地方官民於鹽河各漫溢處查勘就勢籌堵以防春漲淹及田廬且使黃水順流而下於運道更有裨益再鹽河北有徒駭馬頰二河向設涵洞滾水壩分洩運河盛漲馬頰河去張秋畧遠向無漫溢徒駭河在禹城境內者由趙牛河灌入間有出槽又因下游探馬哨鹽河漫溢衝入徒駭致濱州霑化被淹然以大局而論多一入海口門消水較暢於運道亦有裨益惟沿河田廬水到成災明年春汛靡常更覺可慮臣於經過處所進耆老村民諄諄勸諭令相勢籌禦保護

村莊該民等自念田廬又經此番震恐無不踴躍急
公再得官爲輕理其成功必速臣因揀派崔映辰劉
大紳李如珩等協同地方官分道查勘除濮范利津
蒲臺等處上游不堵地當其衝恐難免水患其餘各
州縣相機保護似不致再遭淹浸是順民心以用民
力較之動款興工官爲辦理者更有實濟儻其中民
力尙須協濟再酌量捐修亦可歲事至各屬被水之
區秋禾已收未盡漂失尙可餬口再得棉襖一萬數
千件酌散窮黎並分別極次貧民給與賑卹核計歲
內可免饑寒之苦

運河
道冊

是月二十七日奉

上諭鐵保奏稱海口宣洩甚暢水勢已消去三四尺覽
奏差爲幸慰此次黃水漫溢總由豫省宣防不力致奪
溜北趨波及東省皆係嵇承志馬慧裕等之咎現在豫
省業已興工堵築朕疊經降旨責令剋期歲事該河督
等亦自知疎防干咎不遺餘力趕緊督辦但合龍日期
究難豫必明春凌汛後接以桃汛水勢必大重運經過
關係緊要鐵保等總不可存冬令合龍河流卽歸故道
之意惟當會同費淳豫爲設法務使運道無阻漕船過
行一過張秋必將該撫等施以重恩勉之至各州縣被
水災黎亟須撫卹勿致失所該撫現在查勘各屬完竣
後或地方有應辦事件暫回省城仍當卽赴張秋隨時

督率經理費淳尙須赴臺莊勘辦運河情形也又另片
奏沿河地方籌畫修築等事自當以次徐爲辦理其所
派之崔映辰劉大紳李如珩三員朕亦知其居官素好
自能妥協百姓皆吾赤子不但官與民親卽朕痾瘵在
抱亦與閭閻休戚相關果能仰體德意實心辦理民事
則得其心者卽得其力何患不治惟在該撫倡率經理
急公趨事以衛民生爲要

運河
道冊

是月二十八日吳璫奏臣行次臺莊適漕臣吉綸由
八閘押催浙江尾幫行抵江境臣計議現在回空將
竣來年重運尤須豫籌但濟運之策不外導引來源
節宣去路洪澤湖爲最大現已多方收蓄新運到時

續行水金鑑卷二百七

運河水 三

河口尙易料理其楊莊以北江境運河專賴微湖灌
注來源較弱其南河本境內駱馬湖尾閘已飭煞壩
收水並將沂水入運之沙家口徐塘口支河亦飭廳
營疏浚深通以備來年濟運惟邳宿地勢建瓴水難
存留仍易淺澀是去路擊蓄尤不可不多方籌畫邳
宿汛內清定成三閘每年水淺時本俱拗板打放此
外尙有滙澤利運滌流等閘因從前豐工曹工漫水
下注淤成平陸漕船俱由各越河行走而越河但能
收窄不能啟閉必須各閘河照舊挑通堵閉越河使
漕船由正閘打放則案塘啟閉操縱在人蓄水浮送
又於邳宿汛內及宿桃交界相度河寬水淺處酌築

束水草壩祇留口門數丈則水有擎束再將古淺新淤挑深水流到此更有瀦蓄不至直瀉無餘如冬春雨雪霑足微湖水旺兼得沂蒙山水匯注充盈固屬甚善即使水勢稍弱而如此挑築兼施節宣有制臨時相機接濟總可設法通行所有各草壩現已趕築各開河亦已委員確估至應挑淤淺工段業經漕臣吉綸查明開單交臣派員承辦俟湖廣尾幫挽出楊莊東省湖口閘閉版掣乾底水卽行估挑按段興辦茲蒙

特命王念孫自臺莊至楊莊經理運道更可再加細勘熟籌妥善統俟會商吉綸王念孫將各工段落長丈

續行水金鑑卷一百七

運河水

三

銀數核定後會奏現在已過河漕船共七十三幫俱銜尾南下在後祇有張秋阻水之十幫內浙船四幫業已挽入江境催令趕緊前進最後湖廣六幫聞亦行抵韓莊八閘漕臣尙在臺莊上下催儻陸續南來均可無誤歸次

南河成案續編

是月三十日費淳奏臣等會奏籌辦運道欽奉

諭旨令臣仍駐張秋經理一切遵卽回至張秋將運道緊要工程督廳營等先辦其可稍緩者俟來春估修以歸撙節查張秋西岸舊有裹頭適當口門湍急之處日被河溜衝刷愈形單薄前經會勘必得添鑲磨盤埽壩並於河面坡面各鑲埽工方資挑溜而護隄

岸彼時因回空漕船均由此出口且購料需時是以未能辦理今空船過竣正雜各料已齊十月二十九日集夫開工照估定丈尺如式趕做惟三面皆水取土較難茲擇稍遠曠地雇夫挑取用船裝運至東岸舊有隄爲重運糧船進口屏障現在隄身內外被水淹久必致坍塌前估加高培厚鑲築埽工現亦次第興修並派原任泲河同知王轂專司兼辦臣不時親往督查務期工堅料實以便來春重運經臨挽行無滯再節交大雪水落歸槽測探張秋北口至南口止河內均水深一丈二二尺不等南北一帶坡內水深六七尺及三四尺不等南口坡內之江家莊等處水僅一尺四五寸較前已多消落察看黃水溜勢亦平商民船隻往來不致險阻

運河
道冊

